

სახელმძღვანელო წესი

არჩევნების პერიოდში საქართველოს ორგანული კანონის საქართველოს საარჩევნო კოდექსით გათვალისწინებული ვალდებულებების შესრულების უზრუნველსაყოფად, მერიის საჯარო მოსამსახურეთა, მუნიციპალიტეტის მიერ დაფუძნებული ა(ა)იპ-ის და სსიპ-ის თანამშრომლებისთვის

თავი I. ზოგადი დებულებანი, რეგულირების სფერო და მიზანი

მუხლი 1. ზოგადი დებულებანი

არჩევნების პერიოდში საქართველოს საარჩევნო კოდექსით გათვალისწინებული ვალდებულებების შესრულების უზრუნველსაყოფად, მერიის საჯარო მოსამსახურეთა, მუნიციპალიტეტის მიერ დაფუძნებული ა(ა)იპ-ის და სსიპ-ის თანამშრომლებისთვის სახელმძღვანელო წესი (შემდგომში - წესი) შემუშავებულია საქართველოს ორგანული კანონის „საქართველოს საარჩევნო კოდექსი“ (შემდგომში - კოდექსი), სხვა საკანონმდებლო და კანონქვემდებარე რეგულაციების შესაბამისად.

მუხლი 2. რეგულირების სფერო და მიზანი

ეს წესი განსაზღვრავს არჩევნების პერიოდში ბორჯომის მუნიციპალიტეტის მერიის საჯარო მოსამსახურეთა (შემდგომში - საჯარო მოსამსახურე) და მუნიციპალიტეტის მიერ დაფუძნებული ა(ა)იპ-ის და სსიპ-ის თანამშრომელთა უფლება - მოვალეობებს, მიზნად ისახავს საჯარო მოსამსახურეთა და მუნიციპალიტეტის მიერ დაფუძნებული ა(ა)იპ-ის და სსიპ-ის თანამშრომელთა მიერ საარჩევნო კანონმდებლობის დარღვევის აღკვეთას და დარღვევებზე რეაგირების მექანიზმის გაუმჯობესებას.

მუხლი 3. ტერმინთა განმარტება

1. ამ წესის მიზნებისთვის მასში გამოყენებულ ტერმინებს აქვს შემდეგი მნიშვნელობა:

- ა) არჩევნები - 2024 წლის საპარლამენტო (საქართველოს პარლამენტისა და აჭარის ავტონომიური რესპუბლიკის უმაღლესი საბჭოს) არჩევნები;
- ბ) არჩევნების პერიოდი - არჩევნების დანიშვნის თაობაზე გამოცემული სამართლებრივი აქტის გამოქვეყნებიდან არჩევნების საბოლოო შედეგების გამოქვეყნებამდე დროის პერიოდი (მათ შორის წინასაარჩევნო პერიოდი, კენჭისყრის (არჩევნების) დღე);
- გ) წინასაარჩევნო პერიოდი - არჩევნების დანიშვნის თაობაზე გამოცემული სამართლებრივი აქტის გამოქვეყნებიდან კენჭისყრის (არჩევნების) დღემდე დროის ინტერვალი;

დ) მერია - მერია არის მუნიციპალიტეტის აღმასრულებელი ორგანოსადმი დაქვემდებარებული დაწესებულება, რომელიც უზრუნველყოფს მერის უფლებამოსილების განხორციელებას და რომელსაც ხელმძღვანელობს მერი და სტრუქტურულად შედგება მერისგან, მისი მოადგილე(ებ)ისა და ადმინისტრაციისაგან (მერიის სტრუქტურული ქვედანაყოფ(ებ)ის ხელმძღვანელ(ებ)ისა და სხვა საჯარო მოსამსახურეებისაგან).

ე) საჯარო მოსამსახურე - მერიის საჯარო მოსამსახურე (მერიის სტრუქტურული ერთეულის ხელმძღვანელი, სხვა საჯარო მოსამსახურე, აგრეთვე მერის პირველი მოადგილე და მოადგილე(ებ)ი).

ვ) ა(ა)იპ-ის თანამშრომელ(ებ)ი - მუნიციპალიტეტის მიერ დაფუძნებული არასამეწარმეო (არაკომერციული) იურიდიული პირის თანამშრომელი (ები).

ზ) სსიპ-ის თანამშრომელ(ებ)ი - მუნიციპალიტეტის მიერ დაფუძნებული საჯარო სამართლის იურიდიული პირის თანამშრომელი (ები).

2. ამ წესში გამოყენებულ სხვა ტერმინებს გააჩნიათ კოდექსით და „საჯარო სამსახურის შესახებ“ საქართველოს კანონით განსაზღვრული მნიშვნელობა.

თავი II. არჩევნები

მუხლი 4. საარჩევნო პროცესი

1. არჩევნები არის საარჩევნო პროცესი, რომლის დანიშნულება და შედეგია საჯარო ხელისუფლების წარმომადგენლობითი ორგანოებისა და საჯარო ხელისუფლების თანამდებობის პირთა არჩევა;

2. არჩევნები ტარდება საყოველთაო, თანასწორი და პირდაპირი საარჩევნო უფლების საფუძველზე, ფარული კენჭისყრით.

3. არჩევნებში მონაწილეობის უფლების მქონე პირებს აქვთ შესაძლებლობა, დაუბრკოლებლად და რაიმე ზემოქმედების გარეშე ხმა მისცენ სასურველ კანდიდატებს, რაც საფუძველია არჩევნების შედეგებით ელექტორატის ნების სამართლიანი ასახვისა.

მუხლი 5. შეკრებისა და ნების გამოვლენის უფლება

1. ყველას, გარდა იმ პირებისა, რომლებიც არიან სამხედრო ძალებისა და შინაგან საქმეთა სამინისტროს შემადგენლობაში, უფლება აქვს, წინასწარი ნებართვის გარეშე შეიკრიბოს საჯაროდ და უიარაღოდ როგორც ჭერქვეშ, ისე გარეთ. თუმცა, აკრძალულია გამოხატვისა და შეკრების თავისუფლებით სარგებლობისას სხვა ადამიანების უფლებების ხელყოფა, მათ შორის, არჩევნებში

მონაწილე სუბიექტის ამომრჩეველთან შეხვედრის ხელშეშლა, ჩაშლა, განსხვავებული აზრის მქონე პირებთან დაპირისპირება, მათი შეურაცხყოფა, ძალადობა ან ამგვარის მცდელობა.

2. აკრძალულია ნებისმიერი ზემოქმედება, რომელიც ზღუდავს ამომრჩეველის ნების თავისუფალ გამოვლენას, და კონტროლი ამომრჩეველის ნების გამოვლენაზე.

მუხლი 6. საჯარო მოსამსახურეთა ზოგადი ვალდებულებები

1. საჯარო მოსამსახურეები, როგორც ხელისუფლების პირველწყარო ხალხის მიერ არჩეული მმართველობისა და მოსახლეობის (მოქალაქეების) სამსახურში მყოფი პირები, ამასთანავე ა(ა)იპ-ის და სსიპ-ის თანამშრომლები, პირველ რიგში არიან ვალდებული იყონ სამაგალითო და დაიცვან განუხრელად არჩევნებთან, როგორც ხელისუფლების თავისუფალ, სამართლიან ფორმირებასა და მამასადამე დემოკრატიული სახელმწიფოს მშენებლობისგან განუყოფელი საარჩევნო კანონმდებლობის ნორმები და მოთხოვნები.

2. არჩევნების პერიოდში, ისე, როგორც სხვა დროს, საჯარო მოსამსახურეებზე და მუნიციპალიტეტის მიერ დაფუძნებული ა(ა)იპ-ის და სსიპ-ის თანამშრომელთა მიმართ ჩვეულებრივ მოქმედებს ქვეყნის ზოგადი წესები, შესაბამისად, მათ აქვთ ვალდებულება საარჩევნო კანონმდებლობასთან ერთად დაიცვან შესაბამისი კანონმდებლობით გათვალისწინებული შესაბამისი რეგულაციები.

თავი III. წინასაარჩევნო კამპანია (აგიტაცია) და მასთან დაკავშირებული შეზღუდვები

მუხლი 7. წინასაარჩევნო კამპანია და აგიტაცია

1. წინასაარჩევნო კამპანია არის საარჩევნო სუბიექტის/საარჩევნო სუბიექტობის კანდიდატის მიერ არჩევნებში მონაწილეობისა და გამარჯვების მიზნით ჩატარებულ ღონისძიებათა ერთობლიობა.

2. წინასაარჩევნო აგიტაცია მოიცავს (გულისხმობს) ამომრჩეველთა მოწოდებას საარჩევნო სუბიექტის/საარჩევნო სუბიექტობის კანდიდატის მხარდასაჭერად ან საწინააღმდეგოდ, აგრეთვე ნებისმიერ საჯარო მოქმედებას, რომელიც ხელს უწყობს ან ხელს უშლის მის არჩევას, ან/და რომელიც შეიცავს წინასაარჩევნო კამპანიის ნიშნებს, მათ შორის, წინასაარჩევნო ღონისძიების ორგანიზებაში/ჩატარებაში მონაწილეობას, საარჩევნო მასალების შენახვას ან გავრცელებას, მხარდამჭერთა სიებზე მუშაობას, პოლიტიკური პარტიების წარმომადგენლობებში ყოფნას.

3. წინასაარჩევნო აგიტაციად ჩაითვლება აგრეთვე, წინასაარჩევნო ღონისძიებისას საარჩევნო სუბიექტის/კანდიდატის მხარდასაჭერად ან საწინააღმდეგოდ მიმართული,

ამომრჩეველთა აზრის ფორმირების მიზნით განხორციელებული ქმედება (სიტყვით მიმართვა, ტაში, სტენა, ზეპირი ან წერილობითი მოწოდება), მსვლელობა, მაისურის ან სხვა ატრიბუტის ტარება შესაბამისი საარჩევნო სუბიექტის/კანდიდატის მხარდამჭერი გამოსახულებით, ინტერნეტ სივრცეში (მათ შორის სოციალურ ქსელებში) აგიტაცია ან კონტრაგიტაცია (ნებისმიერი საჯარო მოქმედება, რომელიც მიზნად ისახავს და ემსახურება წინასაარჩევნო აგიტაციას ან კონტრაგიტაციას).

მუხლი 8. წინასაარჩევნო კამპანიის (აგიტაციის) მიმდინარეობა

1. წინასაარჩევნო კამპანია (აგიტაცია) იწყება არჩევნების დანიშვნის თაობაზე გამოცემული სამართლებრივი აქტის გამოქვეყნებისთანავე და ემთხვევა წინასაარჩევნო პერიოდს.
2. წინასაარჩევნო კამპანიის (აგიტაციის) პერიოდში პოლიტიკურ პარტიას, საარჩევნო სუბიექტობის კანდიდატს, საარჩევნო სუბიექტს უფლება აქვთ, დაამზადონ წინასაარჩევნო მოწოდებები, განცხადებები, წარწერები, ფურცლები, ფოტომასალები და სხვა.
3. პოლიტიკურ პარტიას, საარჩევნო სუბიექტობის კანდიდატს, საარჩევნო სუბიექტს და მათ მხარდამჭერებს უფლება აქვთ, გამოვიდნენ მომავალი საქმიანობის პროგრამით.

მუხლი 9. წინასაარჩევნო აგიტაციაში საჯარო მოსამსახურეთა მონაწილეობა

1. საჯარო მოსამსახურეს და მუნიციპალიტეტის მიერ დაფუძნებული ა(ა)იპ-ის სა სსიპ-ის თანამშრომელს წინასაარჩევნო აგიტაციაში მონაწილეობის უფლება აქვს მხოლოდ არასამუშაო საათებში და/ან იმ დროს, როდესაც უშუალოდ არ ახორციელებს სამსახურებრივ უფლებამოსილებას. სამუშაო საათებში და/ან სამსახურებრივი უფლებამოსილების უშუალოდ შესრულებისას საჯარო მოსამსახურეს ეკრძალება წინასაარჩევნო აგიტაციაში რაიმე ფორმით მონაწილეობის მიღება.
2. საჯარო მოსამსახურეთათვის და მუნიციპალიტეტის მიერ დაფუძნებული ა(ა)იპ-ის და სსიპ-ის თანამშრომელთათვის ისე, როგორც სხვა ნებისმიერი პირისათვის აკრძალულია წინასაარჩევნო მოწოდებების, განცხადებების, წარწერების, ფურცლების, ფოტომასალების და სხვა სააგიტაციო მასალის (საშუალებების) გავრცელებისათვის ხელის შეშლა და ჩამორთმევა, აგრეთვე სააგიტაციო დანიშნულების ავტოსატრანსპორტო და სპეციალური მოწყობილობით აღჭურვილი სხვა საშუალებების ჩამორთმევა და წინასაარჩევნო აგიტაციის მიზნით მათი გამოყენებისათვის ხელის შეშლა.
3. წინასაარჩევნო აგიტაციის გაწევა სამუშაო საათების განმავლობაში და/ან სამსახურებრივი უფლებამოსილებების შესრულებისას არ ეზღუდებათ კოდექსით განსაზღვრულ პოლიტიკურ თანამდებობის პირებს (საქართველოს პრეზიდენტი, საქართველოს პარლამენტის წევრი, საქართველოს პრემიერ-მინისტრი, საქართველოს მთავრობის სხვა წევრები და მათი მოადგილეები, აფხაზეთისა და აჭარის ავტონომიური რესპუბლიკების უმაღლესი წარმომადგენლობითი ორგანოების წევრები, აფხაზეთისა და აჭარის ავტონომიური რესპუბლიკების

მთავრობათა ხელმძღვანელები, აგრეთვე ადგილობრივი თვითმმართველობის წარმომადგენლობითი ორგანოს წევრი და აღმასრულებელი ორგანოს ხელმძღვანელი, სახელმწიფო რწმუნებული – გუბერნატორი).

მუხლი 10. წინასაარჩევნო კამპანიასთან (აგიტაციასთან) დაკავშირებული შეზღუდვები

1. აკრძალულია:

ა) წინასაარჩევნო კამპანიის (აგიტაციის) ჩატარება სახელმწიფო ხელისუფლების (მათ შორის საქართველოს აღმასრულებელი ხელისუფლების დაწესებულებების, სასამართლოების, სამხედრო ნაწილების) და ადგილობრივი თვითმმართველობის ორგანოების შენობებში;

ბ) სააგიტაციო მასალის საკულტო ნაგებობებზე, კულტურული მემკვიდრეობის შენობა-ნაგებობებზე, სახელმწიფო ხელისუფლებისა და ადგილობრივი თვითმმართველობის ორგანოების, სასამართლოების, პროკურატურის, სამხედრო შენაერთების, პოლიციის, საქართველოს სახელმწიფო უსაფრთხოებისა და დაზვერვის სამსახურების და სახელმწიფო დაცვის სპეციალური სამსახურის დანაყოფების შენობების ინტერიერებსა და ექსტერიერებში, საგზაო ნიშნებზე და აგრეთვე, მუნიციპალიტეტის მიერ კანონმდებლობით დადენილი წესით აკრძალულ ადგილებში (ასეთის არსებობის შემთხვევაში) განთავსება/გაკვრა;

გ) საქართველოს სახელმწიფო ბიუჯეტის/ადგილობრივი თვითმმართველი ერთეულის ბიუჯეტის დაფინანსებით ორგანიზებულ ღონისძიებაზე/პრეზენტაციაზე ორგანიზატორის მიერ წინასაარჩევნო აგიტაციის გაწევა. აღნიშნული ქმედება ჩაითვლება ადმინისტრაციული რესურსების გამოყენებად;

დ) ტოტალიზატორის გამართვა არჩევნებთან დაკავშირებულ ნებისმიერ საკითხზე;

ე) სააგიტაციო მასალის ჩამოხსნა, ჩამოხვევა, დაფარვა ან დაზიანება, თუ ის აკრძალულ ადგილას არ არის განთავსებული.

2) კენჭისყრის დღეს აკრძალულია:

ა) კენჭისყრის შენობაში – წინასაარჩევნო აგიტაცია;

ბ) წინასაარჩევნო ფასიანი ან/და უფასო რეკლამის განთავსება ტელევიზიისა და რადიოს ეთერში.

მუხლი 11. ამომრჩევლის მოსყიდვა არჩევნების

პერიოდში აკრძალულია:

ა) საარჩევნო სუბიექტების, საარჩევნო სუბიექტობის კანდიდატებისა და მათი წარმომადგენლების მიერ პირადად ან ვინმეს მეშვეობით საქართველოს მოქალაქეებისათვის ფულადი სახსრების, საჩუქრებისა და სხვა მატერიალურ ფასეულობათა გადაცემა (მიუხედავად მათი ღირებულებისა), შეღავათიან ფასად საქონლის მიყიდვა, უფასოდ ნებისმიერი საქონლის (გარდა კოდექსით გათვალისწინებული სააგიტაციო მასალისა) მიწოდება ან გავრცელება, აგრეთვე საქართველოს მოქალაქეების დაინტერესება ფულადი სახსრების, ფასიანი ქაღალდებისა და სხვა მატერიალურ ფასეულობათა გადაცემის დაპირებით (მიუხედავად მათი ღირებულებისა). რაც გულისხმობს იმას, რომ საჯარო მოსამსახურეს (ისე, როგორც ნებისმიერ სხვა პირს) ეკრძალება საარჩევნო სუბიექტის, საარჩევნო სუბიექტობის კანდიდატის სასარგებლოდ ამ მოქმედებ(ებ)ის განხორციელება, მათ შორის არასამუშაო პერიოდში.

ბ) ფიზიკური და იურიდიული პირების მიერ პირადი ფულადი სახსრებით ან/და საარჩევნო სუბიექტის სახსრებით ისეთი სამუშაოს შესრულება ან მომსახურების გაწევა (გარდა „სახელმწიფო შესყიდვების შესახებ“ საქართველოს კანონით დადგენილი წესით მოპოვებული სამუშაოს შესრულებისა ან მომსახურების გაწევისა), რომელიც საქართველოს კანონმდებლობის შესაბამისად განეკუთვნება საქართველოს სახელმწიფო ხელისუფლების ან/და ადგილობრივი თვითმმართველობის ორგანოთა კომპეტენციას. რაც გულისხმობს იმას, რომ საჯარო მოსამსახურეს, ისევე როგორც მუნიციპალიტეტის მიერ დაფუძნებული ა(ა)იპ-ის და სსიპ-ის თანამშრომელს (ისე, როგორც ნებისმიერ სხვა პირს) ეკრძალება (მათ შორის არასამუშაო პერიოდში) პირადი ან საარჩევნო სუბიექტის სახსრებით გაწიოს ისეთი სამუშაო, რომლის შესრულებაც სახელმწიფო ან ადგილობრივი თვითმმართველობის ორგანოების ფუნქციაა.

მუხლი 12. წინასაარჩევნო აგიტაციისა და კამპანიისა ადმინისტრაციული რესურსების გამოყენების აკრძალვა

წინასაარჩევნო კამპანიის პერიოდში საჯარო მოსამსახურეს და მუნიციპალიტეტის მიერ დაფუძნებული ა(ა)იპ-ის და სსიპ-ის თანამშრომელს (ამ წესის მე-9 მუხლის პირველი პუნქტის გათვალისწინებით) ეკრძალება რომელიმე პოლიტიკური პარტიის, საარჩევნო სუბიექტობის კანდიდატის, საარჩევნო სუბიექტის მხარდასაჭერად ან საწინააღმდეგოდ წინასაარჩევნო აგიტაციისა და კამპანიის პროცესში ადმინისტრაციული რესურსების გამოყენება; მათ შორის, ეკრძალება:

ა) სახელმწიფო ხელისუფლებისა და ადგილობრივი თვითმმართველობის ორგანოების მიერ, აგრეთვე იმ ორგანიზაციების მიერ, რომლებიც საქართველოს სახელმწიფო ბიუჯეტიდან ფინანსდებიან, დაკავებული შენობების გამოყენება იმ შემთხვევაში, თუ სხვა პოლიტიკურ

პარტიებს, საარჩევნო სუბიექტობის კანდიდატებს, საარჩევნო სუბიექტებს არა აქვთ იმავე ან ანალოგიური დანიშნულების შენობების იმავე პირობებით გამოყენების შესაძლებლობა;

ბ) სახელმწიფო ხელისუფლების დაწესებულებებისათვის ან ადგილობრივი თვითმმართველობის ორგანოებისა და იმ ორგანიზაციებისათვის, რომლებიც საქართველოს სახელმწიფო ბიუჯეტიდან ფინანსდებიან (გარდა პოლიტიკური პარტიებისა), განკუთვნილი საკომუნიკაციო საშუალებების, საინფორმაციო მომსახურებისა და სხვადასხვა სახის ტექნიკის გამოყენება;

გ) სახელმწიფო ხელისუფლების ან ადგილობრივი თვითმმართველობის ორგანოების საკუთრებაში არსებული სატრანსპორტო საშუალებების გამოყენება;

დ) ადმინისტრაციული ორგანოს ბალანსზე არსებული ნებისმიერი ქონების (მათ შორის: ტელეფონი, ფაქსი, კომპიუტერი, ქაღალდი, ბაინდერი, საწვავი და სხვა) გამოყენება;

ე) საქართველოს სახელმწიფო ბიუჯეტის/ადგილობრივი თვითმმართველი ერთეულის ბიუჯეტის დაფინანსებით ორგანიზებულ ღონისძიებაზე/პრეზენტაციაზე წინასაარჩევნო აგიტაციის გაწევა.

მუხლი 13. საბიუჯეტო თანხების, თანამდებობრივი ან სამსახურებრივი მდგომარეობის გამოყენების აკრძალვა

1. საჯარო მოსამსახურეს, მუნიციპალიტეტის მიერ დაფუძნებული ა(ა)იპ-ის და სსიპ-ის თანამშრომელს (ამ წესის მე-9 მუხლის პირველი პუნქტის გათვალისწინებით) ეკრძალება რომელიმე პოლიტიკური პარტიის, საარჩევნო სუბიექტობის კანდიდატის, საარჩევნო სუბიექტის მხარდასაჭერად ან საწინააღმდეგოდ წინასაარჩევნო აგიტაციისა და კამპანიის წარმოების პროცესში თავისი თანამდებობრივი ან სამსახურებრივი მდგომარეობის გამოყენება, რაც გულისხმობს:

ა) სამსახურებრივად დაქვემდებარებული ან სხვაგვარად დამოკიდებული პირის ჩაბმას ისეთ საქმიანობაში, რომელიც ხელს უწყობს კანდიდატის წარდგენას ან/და არჩევას;

ბ) სახელმწიფო ხელისუფლების ან ადგილობრივი თვითმმართველობის ორგანოს მიერ დაფინანსებული სამსახურებრივი მივლინებების დროს ხელმოწერების შეგროვებას და წინასაარჩევნო აგიტაციის გაწევას;

გ) წინასაარჩევნო აგიტაციის გაწევას სამუშაო საათების განმავლობაში ან/და სამსახურებრივი ფუნქციების შესრულებისას.

2. არჩევნების დღემდე მე-60 დღიდან არჩევნების დღის ჩათვლით აკრძალულია ისეთი პროექტების/პროგრამების განხორციელება, რომლებიც მანამდე არ იყო გათვალისწინებული საქართველოს სახელმწიფო, ავტონომიური რესპუბლიკის რესპუბლიკურ ან ადგილობრივი თვითმმართველი ერთეულის ბიუჯეტში, გარდა იმ შემთხვევისა, როდესაც პროექტი/პროგრამები ფინანსდება არჩევნების დღემდე არანაკლებ 60 დღით ადრე შესაბამისი ბიუჯეტის სათანადო

პროგრამული კოდით გათვალისწინებული ასიგნებების ფარგლებში ან/და ამ ასიგნებებიდან გამოყოფილი სახსრებით, აგრეთვე დონორების მიერ გამოყოფილი სახსრებით.

3. არჩევნების დღემდე მე-60 დღიდან არჩევნების დღის ჩათვლით აკრძალულია სოციალური გასაცემლების (პენსია, სოციალური დახმარება, შემწეობა და სხვა) ოდენობების ზრდა, გარდა იმ გასაცემლებისა, რომელთა ოდენობების ზრდა საქართველოს კანონმდებლობით გათვალისწინებული იყო არჩევნების დღემდე არანაკლებ 60 დღით ადრე, აგრეთვე ისეთი სოციალური გასაცემლების (პენსია, სოციალური დახმარება, შემწეობა და სხვა) ან/და შეღავათების დაწესება, რომლებიც არჩევნების დღემდე არანაკლებ 60 დღით ადრე გათვალისწინებული არ იყო საქართველოს კანონმდებლობით.

4. ამ მუხლის მე-2 და მე-3 პუნქტების მოქმედება არ ვრცელდება სტიქიური უბედურების ან სხვა ფორსმაჟორული გარემოების შედეგების სალიკვიდაციო ღონისძიებებისა და ამ კანონის შესაბამისად სახელმწიფო ან/და მუნიციპალიტეტის ორგანოთა მიერ კენჭისყრის შენობის მოწყობის ან/და სარემონტო სამუშაოების დაფინანსებაზე.

5. წინასაარჩევნო კამპანიის პერიოდში აკრძალულია საქართველოს სახელმწიფო ბიუჯეტის/ადგილობრივი თვითმმართველი ერთეულის ბიუჯეტის სახსრებით ისეთი სააგიტაციო მასალის, ვიდეო ან აუდიომასალის დამზადება, ვებგვერდის ან მისი ნაწილის შექმნა, რომელშიც/რომელზედაც ასახულია ესა თუ ის საარჩევნო სუბიექტი/პოლიტიკური პარტია ან მისი არჩევნებში მონაწილეობის რიგითი ნომერი ან/და რომელიც შეიცავს ამა თუ იმ საარჩევნო სუბიექტის/პოლიტიკური პარტიის მხარდასაჭერ/საწინააღმდეგო ინფორმაციას. იმავე პერიოდში აკრძალულია საქართველოს სახელმწიფო ბიუჯეტის/ადგილობრივი თვითმმართველი ერთეულის ბიუჯეტის სახსრებით დამზადებულ სოციალურ რეკლამაში საარჩევნო სუბიექტის/პოლიტიკური პარტიის ან მისი რიგითი ნომრის გამოყენება.

მუხლი 14. მერიის ხელმძღვანელ თანამდებობის პირთა სხვა შეზღუდვები

საარჩევნო სუბიექტების რეგისტრაციის ვადის გასვლიდან კენჭისყრის დღის დამთავრებამდე აკრძალულია მერიის ხელმძღვანელ თანამდებობის პირთა საკადრო გადაადგილება, გარდა მათი უფლებამოსილების ვადის გასვლის ან/და მათ მიერ კანონის დარღვევის შემთხვევებისა.

თავი IV. საჯარო მოსამსახურის და მუნიციპალიტეტის მიერ დაფუძნებული ა(ა)იპ-ის

და სსიპ-ის თანამშრომელთა მონაწილეობა საარჩევნო ადმინისტრაციის საქმიანობაში

მუხლი 15. საუბნო საარჩევნო კომისიის წევრობა

საუბნო საარჩევნო კომისიის წევრად შეიძლება დაინიშნოს/აირჩეს საჯარო მოსამსახურე (გარდა საქართველოს საარჩევნო კოდექსის 24-ე მუხლის მე-5 პუნქტის „დ“-„კ“ ქვეპუნქტებით გათვალისწინებული პირებისა). მასზე არ გავრცელდება „საჯარო სამსახურის შესახებ“ საქართველოს კანონით თანამდებობრივი შეუთავსებლობის შესახებ დადგენილი მოთხოვნები. საუბნო საარჩევნო კომისიის წევრად საჯარო მოსამსახურის დანიშვნის/არჩევის შემთხვევაში საჯარო მოსამსახურეს საუბნო საარჩევნო კომისიის წევრის უფლებამოსილების განხორციელების პერიოდში დროებით შეიძლება შეუჩერდეს უფლებამოსილება მუდმივ სამუშაო ადგილას, რისთვისაც მას კანონით დადგენილი წესით ეძლევა ანაზღაურებისგარეშე შვებულება ან კუთვნილი ანაზღაურებადი შვებულება საკუთარი მოთხოვნის შესაბამისად.

საუბნო საარჩევნო კომისიის წევრად არ შეიძლება აირჩეს/დაინიშნოს მუნიციპალიტეტის მერი და მისი მოადგილეები.

ადგილობრივი დამკვირვებელი ორგანიზაციის ადგილობრივი დამკვირვებელი შეიძლება იყოს საქართველოს მოქალაქე 18 წლის ასაკიდან, გარდა მუნიციპალიტეტის მერისა და მისი მოადგილისა.

თავი V. პასუხისმგებლობა საარჩევნო კანონმდებლობის დარღვევისათვის

მუხლი 16. საქართველოს ორგანული კანონის საქართველოს საარჩევნო კოდექსით გათვალისწინებული პასუხისმგებლობის ზომები

1. წინასაარჩევნო აგიტაციაში ამ კანონის მოთხოვნათა დარღვევით მონაწილეობა გამოიწვევს დაჯარიმებას 2 000 ლარის ოდენობით (მუხლი 79).

2. კოდექსით დადგენილი წესით:

ა) წინასაარჩევნო მოწოდებების, განცხადებების, წარწერების, ფურცლების, ფოტო და სხვა მასალების გავრცელებისათვის ხელის შეშლა და ჩამორთმევა, აგრეთვე სააგიტაციო დანიშნულების ავტოსატრანსპორტო და სპეციალური მოწყობილობით აღჭურვილი სხვა საშუალებების ჩამორთმევა ან წინასაარჩევნო აგიტაციის მიზნით მათი გამოყენებისათვის ხელის შეშლა გამოიწვევს დაჯარიმებას 1 000 ლარის ოდენობით

ბ) იგივე ქმედება, ჩადენილი თანამდებობის პირთა მიერ გამოიწვევს დაჯარიმებას 2000 ლარის ოდენობით (მუხლი 80).

3. საარჩევნო კამპანიის ჩატარება იმ დაწესებულებათა შენობებში, რომლებიც აკრძალულია კოდექსით, და ასეთი ნებართვის გაცემა უფლებამოსილი პირის მიერ გამოიწვევს დაჯარიმებას 1 000 ლარის ოდენობით (მუხლი 81).

4. წინასაარჩევნო აგიტაციისას და კამპანიისას ადმინისტრაციული რესურსების გამოყენებისას და თანამდებობრივი ან სამსახურებრივი მდგომარეობის გამოყენებისას ამ კანონით დადგენილი მოთხოვნების დარღვევა გამოიწვევს დაჯარიმებას 2 000 ლარის ოდენობით (მუხლი 88).

5. კენჭისყრის შენობაში ყოფნის უფლების მქონე პირისათვის ჩანაწერთა წიგნში ჩანაწერის შეტანაში ხელის შეშლა გამოიწვევს შესაბამისი პირების დაჯარიმებას 500 ლარის ოდენობით (მუხლი 90).

6. ადგილობრივი/საერთაშორისო დამკვირვებლის, საარჩევნო სუბიექტისა და მედიის წარმომადგენლების ამ კანონით დადგენილი უფლებების შეზღუდვა ან მათი საქმიანობისათვის ხელის შეშლა გამოიწვევს შესაბამისი პირის დაჯარიმებას 500 ლარის ოდენობით (მუხლი 91).

7. საარჩევნო კომისიის ფუნქციებსა და საქმიანობაში ჩარევა გამოიწვევს შესაბამისი პირის დაჯარიმებას 500 ლარის ოდენობით (მუხლი 91¹).

მუხლი 17. სხვა აქტებით გათვალისწინებული პასუხისმგებლობის შემთხვევები მე-16 მუხლში გათვალისწინებული პასუხისმგებლობის გარდა საჯარო მოსამსახურის, მუნიციპალიტეტის მიერ დაფუძნებული ა(ა)იპ-ის და სსიპ-ის თანამშრომლის მიერ სხვა სახის გადაცდომის (დარღვევის) შემთხვევებზე პასუხისმგებლობის ზომები განისაზღვრება შესაბამისი კანონმდებლობით დადგენილი წესით.